

आकाशवाणी

पैहले खास-खास खबरां:-

1. वेनेज़ुएला दिआं कार्यवाहक राष्ट्रपति डेल्सी रोड्रिगज़ अज्जै थमां भारत दी 5एं दिनें दी जातरा पर रौहगन।
2. कांग्रेस पार्टी दे वरिष्ठ नेता डी.के. शिव कुमार अज्ज कर्नाटक दे 25में मुखमन्त्री दे तौर पर संगंध चुक्कडन।
3. पच्छिम बंगाल सरकार इक बड्डी समाजी कल्याण आली पैहलकदमी दे तैहत अज्जै थमां “अन्नपूर्णा” योजना दी शुरुआत करोग। मुखमन्त्री शुभेंदु अधिकारी एहदा औपचारिक शुभारम्भ करडन।
4. बंगलादेश दे बदेशमन्त्री खलीलुर रहमान- संयुक्त राष्ट्र महासभा दे 81में इजलास दे अध्यक्ष चुने गे न। विदेश मन्त्री डाक्टर एस. जयशंकर होरें उनेंगी मुबारकबाद दिती ऐ।
5. जर्मनी थमां होइयै ब्हाई जातरा करने ते कुसै त्रीये मुख्य जाने आले भारती बसनीके लेई ट्रांजिट वीज़ा दी अत लाज़मी बवस्था अज्जै थमां खत्म होई गेई ऐ।
6. महिला क्रिकेट च इंग्लैंड ने कल रातीं टॉनटन च खेड्डे गेदे त्रीये ते अखीरले टी-20 अंतराष्ट्री मैच च भारत गी 6एं विकटें कन्ने हराइयै 3 मैचें दी एह श्रृंखला 2-1 कन्ने जिती लैती।

Venezuela-India

वेनेजुएला दिआं कार्यवाहक राष्ट्रपति डेल्सी रोड्रिग्स अज्जै थमां भारत दी 5एं दिनें दी जातरा पर रौहडन। उन्दे कन्नै उच्ची स्तह दा डेलीगेशन बी होग- जेहदे च बदेश मंत्रालय- खज़ाना मंत्रालय ते साईस ते टैक्नोलजी मंत्रालय दे बड्डे ऐहलकार शामिल न। इस बारे नमीं दिल्ली च मीडिया गी जानकारी दिंदे होई बदेश मंत्रालय दे प्रवक्ता रणधीर जायसवाल होरें दस्सेआ जे भारत-जातरा दे दरान डेल्सी रोड्रिग्स होर प्रधानमंत्री नरेन्द्र मोदी हुंदे कन्नै दपक्खी गल्लबात करडन। दौनें पक्खें बश्कार बपार- रासपूजी- ऊर्जा- सेहत ते दोआइयें-औषधियें दे खेतर च सैहयोग बधाने पर बी चर्चा होग। बदेश मंत्रालय मूजब- भारत दी सार्वजनिक खेतर दिएं कम्पनियें वेनेजुएला दे ऊर्जा खेतर च बड़ा महत्वपूर्ण निवेश कीता ऐ। इस जातरा दे कन्नै भारत ते वेनेजुएला बश्कार दपक्खी सरबन्ध होर मज़बूत होडन।



Karnatka CM

कांग्रेस पार्टी दे वरिष्ठ नेता डी.के. शिव कुमार अज्ज कर्नाटक दे 25में मुख्मन्त्री दे तौर पर संगंध चुक्कडन। अज्ज संजा 4 बज्जियै 5एं मिंटे पर बेंगलुरु आले लोकभवन च गवर्नर थावर चंद गहलोत होर डी.के शिवकुमार होरेंगी कर्नाटक दे नमें मुख्मन्त्री दे तौर पर ओहदे ते राजदारी दी संगंध चुकाडन। उन्दे कन्नै किश कैबिनेट मंत्रिएं गी बी संगंध चुकाई जाहग। जंदी 28 मई गी सिद्दारमैया हुंदें आसेआ मुख्मन्त्री दे ओहदे शा इस्तीफा देन दे बाद कांग्रेस विधायक दल ने 64एं बरें दे डी.के. शिव कुमार होरेंगी अपना नेता चुनेआ हा। शपथ ग्रहण समारोह च कांग्रेस दे वरिष्ठ नेता राहुल गांधी-

पार्टी दे राश्ट्री अध्यक्ष मल्लिकार्जुन खरगे- कांग्रेस महासचिव के.सी. वेणुगोपाल ते रणदीप सिंह सुरजेवाला हुंदे सनें केई प्रमुख नेता शामिल होगन। डी.के. शिवकुमार हुंदे गृह क्षेत्र डोड्डा-ला-इल्ली दे सरकारी स्कूल दे बच्चें गी बी इस समारोह लेई साददा दिता गेआ ऐ।

<><><><><><>

W.B -Annapurna

पच्छिम बंगाल सरकार इक बड्डी समाजी कल्याण आली पैहलकदमी दे तैहत अज्जै थमां “अन्नपूर्णा” योजना दी शुरुआत करोग। मुखमंत्री शुभेंदु अधिकारी एहदा औपचारिक शुभारम्भ करडन। इस योजना दी शुरुआत दे सरबंध्य च पूरे राज्य च कार्यक्रमें दा आयोजन कीता जाऽरदा ऐ। मुखमंत्री होर इस योजना दे मुख समारोह दी अगुवाई करडन। मुखमंत्री हुंदे सम्बोधन दे तुरत मगरा लाभार्थियें गी मंजूरी पत्र बंडे जाडन। मकामी स्तरें पर शमूलियत बधाने लेई विधायकें गी साददा दिता गेआ ऐ जे ओह अपने सरबंध्यत हलके आले कार्यक्रमें च शामिल होन। शुभेंदु अधिकारी हुंदी मजूदगी आले इस मुख कार्यक्रम दा प्रसारण- वीडियो- कांफ्रेंस दे राहें सिद्धे सबनें ब्लाकें ते मुंसिपल हैड्वार्टरें च बी कीता जाहग।

<><><><><><>

UNGA –Prez

बंगलादेश दे बदेश मंत्री खलीलुर रहमान-संयुक्त राश्ट्र महासभा दे 81में इजलास दे अध्यक्ष चुने गे न। उन्दा कार्यकाल इस बरे सितम्बर थमां शुरु होग। संयुक्त राश्ट्र महासभा च होए दे इस सख्त मुकाबले च रहमान होरेंगी 99 वोट मिले- जिसले के

साइप्रस दे बहु-पक्खी मामलें दे बशेश दूत एंड्रियास कारौरिस होरें'गी 91 वोट हासल होए। अध्यक्ष चुने जाने दे बाद खलीलुर रहमान होरें आखेआ जे ओह मनुक्खी अधिकारें कन्नै जुड़े दे कम्में गी अगगे बधाडन ते अपने कार्यकाल दे दरान सबनै सदस्य देशें कन्नै रलियै कम्म करडन। तोंआई बदेश मंत्री डाक्टर एस.जयशंकर होरें डाक्टर रहमान होरें'गी संयुक्त राश्ट्र महासभा दे 81में इजलास दा अध्यक्ष चुने जाने पर बधाई दिती ऐ। सोशल मीडिया दी इक पोस्ट च जयशंकर होरें आखेआ ऐ जे ओह भारत ते बंगलादेश दी सांझी प्राथमिकताएं गी अगगे बधाने ते मते-पक्खें आले सैहयोग गी मजबूत करने लेई डाक्टर रहमान हुंदे कन्नै रलियै कम्म करने दे ख्वाहिशमंद न।

<><><><><><>

Germany Visa

जर्मनी थमां होइयै ब्हाई जातरा करने ते कुसै त्रीये मुल्ख जाने आले भारती बसनीकें लेई ट्रांजिट वीज़ा दी अत लाज़मी बवस्था अज्जै थमां खत्म होई गई ऐ। भारत च जर्मनी दे राजदूती ने इस फैसले दा ऐलान कीता ते आखेआ जे इस गैह कन्नै जर्मनी थमां होइयै कुसै होर मुल्ख जाने आले भारती बसनीकें दी जातरा मती सखल्ली बनोग। तोंआई भारत ने इस फैसले दा बड़ा मता सुआगत कीता ऐ। बदेश मंत्रालय नै सोशल मीडिया दी इक पोस्ट च दस्सेआ ऐ जे इस नमीं बवस्था दे कन्नै भारत ते जर्मनी बशकार लोकें दे आपसी सम्पर्क ते सरबंधें गी मती मजबूती मिलोग। ध्यानजोग ऐ जे प्रधानमंत्री नरेन्द्र मोदी ते जर्मनी दे चांसलर फ्रेडरिक मर्ज़ हुंदे बशकार इस बरे जनवरी च भारत जातरा दे दरान घोषणा कीती गई ही।

<><><><><><>

Bal Puskar

केन्द्र सरकार ने बच्चें गी दिते जाने आले “प्रधानमंत्री राश्ट्री बाल पुरस्कार -2026” लेई नामांकन मंगे न। नामजदगियां जमा करने दी खीरी तरीक 31 जुलाई ऐ। बड़ी मती प्रतिशठा आले एह पुरस्कार ब्हादरी- समाज सेवा- पर्यारवण संरक्षण- खेड्ढ- कला ते संस्कृति ते विज्ञान ते तकनीकें दे खेतर च असाधारण उपलब्धि हासल करने आले बच्चें गी राश्ट्रपति हुंदे आसेआ प्रदान कीता जंदा ऐ। एहदे नामांकन छड़े राश्ट्री पुरस्कार पोर्टल awards.gov.in दे राहें गै मंजूर कीते जाडन।



JJM-MOUs

केन्द्र सरकार ने ग्रामीण भारत च साफ पीने आहले पानी दी आपूर्ति गी बधाने दे मकसद कन्नै जल जीवन मिशन 2.0 दे तैहत चंऊ प्रदेशें कन्नै समझौता ज्ञापन पर दस्तखत कीते न। एह समझौता अरुणाचल प्रदेश- झारखंड- तमिलनाडू- नागालैंड ते केन्द्र शासत प्रदेश पुद्दुचेरी कन्नै कीता गेआ ऐ। जल शक्ति मंत्रालय ने आखेआ ऐ जे खरे मते सुधारें आस्तै कीता गेदा एह समझौता ग्रामीण इलाकें च पानी दे प्रबंधन आस्तै ग्राम पंचैतें दी अगुआई आहले सेवा आधारत ते समुदाय केन्द्रित नजरिये गी बढावा दिंदा ऐ। जल जीवन मिशन 2.0 दे मकसदे दे मताबक इस पैहल दा लक्ष्य मजबूत जल भागीदारी दे राहें एह यकीनी बनाना ऐ जे हर इक ग्रामीण परोआरें गी पूरी चाल्ली कन्नै सुद्दी मात्रा च हर-रोज साफ पीने आहला पानी उपलब्ध होऐ।



J&K Sec. Meeting

जम्मू-कश्मीर च पंचैत ते जिला विकास परिषद दे चुनाएं दी तयारियें दी समीक्षा आस्तै राज्य चुनांs आयोग दी दंऊ-रोजा उच्ची स्तह दी बैठक अज्जै थमां शुरु होग। बैठक दी अध्यक्षता राज्य चुनां आयुक्त शांतमनु होर करडन। जम्मू-कश्मीर च 9 जनवरी 2024 च पंचैत ते जिला विकास परिषद दा कार्यकाल मुक्की गेआ हा। नगरपालिकाएं दा कार्यकाल अक्टूबर- नवम्बर 2023 च पूरा होई गेआ हा ते जिला विकास परिषद दा कार्यकाल 24 फरवरी 2026 च मुक्की गेआ ऐ। हुन जम्मू-कश्मीर च कोई बी चुने गेदे मकामी निकाय नेई हैन- कीजे पंचैती राज दे त्रवै स्तर ऐल्लै मुक्की गेदे न। हाल च गै पंचैतें आस्तै मतदाता सूची दी बशेश नजरसानी दा कम्म सबूरा होआ ऐ। एहदे मगरा मतदाताएं दी गिनतरी बधियै 72 लख 24 जहार होई गई ऐ। तकरीबन 3 लख 39 जहार 384 नमें मतदाताएं गी सूची च शामिल कीता गेआ ऐ।

<><><><><><>

Women Cricket

महिला क्रिकेट च इंग्लैंड ने कल रातीं टॉनटन च खेड्ढे गेदे त्रीये ते अखीरले टी-20 अंतराष्ट्री मैच च भारत गी 6एं विकेटें कन्नै हराइयै 3 मैचें दी एह श्रृंखला 2-1 कन्नै जिती लैती। इंग्लैंड दी एलिस कैप्सी गी शानदार प्रदर्शन लेई प्लेयर ऑफ द मैच ते प्लेयर ऑफ द सीरिज़ दे खिताब दिते गे। पैहले बल्लेबाजी करदे होई भारती टीम ने तय 20एं ओवरें च 5 विकेटां मुहाइयै 180 रन्ज बनाए हे जेहदे परते च इंग्लैंड ने 18 ओवरें ते 3 गेंदें च लक्ष्य हासल करी लैता।

<><><><><><>